

Marius Bourrelly

Tres galino pèr un gau



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Etang

<http://www.cieldoc.com>

MARIUS BOURBELLY

TRES GALINO PÈR UN GAU

COUMÈDI EN UN ATE

en vers prouvençau.



AIS

EMPREMARIÉ PROVENALO

15, carrièro dóu Grand-Relògi.

1880

DISTRIBUCIEN DE LA PEÇO

Biscoutin, conufisèireL
Calissoun soun assoucia.
Barlingo, oubrié counfisèire.
Muscardino,mouie de Biscoutin.
Bescuechèlo, mouie de calissoun.

La scèno se passo à z'Ais

TRES GALINO PÈR UN GAU

Coumèdi en ate En vers prouvençau

L'arreiro boutigo d'un counfisèire. Au founs e sus lou mitan, uno grando pouerto vitrado, eme de ridèu, que douno dins lou magasin de vèndo. De cade caire dóu founs, douès viseto d'escalié que menon ei chambro. A dèstro, la pouerto dóu labouratòri. Sus la senèco, de saco de marchandiso, de sucre, d'amendo; e souto leis escalié, de jarro de mèu em'uno taulo mounte li a de bescuè.

SCENO PROUMIERO

SUCRADO

(vèn dóu magasin)

A peno l'aubo vèn de pouncheja de l'èstro
E tout àro, lei gènt, pèr querre la menestro
Van courre:—« Dounas-me dous sòu de chicoula:;
« De bescuè de Paris pèr-trempa dins lou la,
« Àves gès de chaudèu pèr moun pichot-canari,
E de lengo de cat?... qu'aganton pas lei gàrri .
« De pan au buerri fres e de creissènt, dei rous,
« Que siegon bèn taura pèr agué meiour goust?..
Soun toutéi de lipet. subrequetout-lei fremo;
Li fau de sucràri vo de cauvo à la cremo.
E n'agantarias mai emé dous dét de mèu....
(*Barlingo arrivo dins lou magasin*)

Tè, vaqui Barlingo ! .. Regardas coumo es beu !...
Es la flous dóu Queiras. vo de Barciloneto. -

SCENO II

SUCRADO, BARLINGO

BARLINGO (*intrant*)

Sieu rèn qu'un mié gavouel, Sucrado, ma paureto;
Mai vous sarés toujour la reino de moun couer.

SUCRADO

Ah ! mi vèngues pas faire ansin teis uei de pouerc.

BARLINGO

L'abo que lou matin parèi sus la mountagno
Auans que lou soulèu ague seca l'aigagno,
Ma bello, es pas tant fresco e poulido que vous.
Toumbarieu pèr dous sòu, tout àro, à tei ginous.

SUCRADO

As pas l'èr tant pressa de li toumba, vouiasso
Quouro si maridan, veguèn? la longo lasso
Tirassariè pièi tròu e n'en voueli fini.

BARLINGO

Ai panca mei papié.

SUCRADO

Rèston bèn de veni !

BARLINGO

Soun pas proun arrousa, coumo lei bourtoulaigo.

SUCRADO

Se t'aviéu coumo acò tengu lou bè dins l'aigo
Pèr te faire intra eici, qu'es qu'auriés di?

BARLINGO

Jamai

Ço qu'avès fa pèr iéu, boutas, l'oublidarai.
Ero un sero d'ivèr, entre sieis e sèt ouro,
E fasié 'n tems à pas metre defouero un chouro
Roudavi coumo un ase escapa dóu canie,
Alucant sus la fouent lou brave rèi Reinié
Tout en fasent gin-gin dins mei braio de tèlo.
Lei pèd dins de soulie vèuse de sei semello.
Lei det góbi, lou nas gounfle coumo un pebroun
E tout espeloufi coumo un vièi passeroun
Qu'avié plus qu'a bada mouri... fasié la paumo:
Que voulès ? quand despiéi tres jour lou vèntre chaumo,
Qu'avès rèn sout la man pèr garni lou fanau
Alor vous soubro plus qu'à faire lei badau,...

Diéu abandouno pas lei paurei creaturo,
Car tout en cóucigant deis artèu, la gèu duro.
Me faguè rescountra ‘n àngi toumba dei nieu ...
Bessai de pas tant aut.

SUCRADO
Aquel àngi èro iéu
E pèr veni d'amount me mancavo leis alo.

BARLINGO
En me vesènt ansin batre la generalo
Lou vèntré à l'espagnolo e linge coumo un fus,
Me demanderias lèu s'èri moussu Sant-Just:
Nàni ! siéu Barlingo qu'elor vous respounderi.

SUCRADO
Aquéu noum disie tout; pèr la man te prengueri...

BARLINGO.
M'aduguerias encò dei messiés Biscoutin
E Calissoun....

SUCRADO
Eici travaines sus lou fin....

BARLINGO
Es vous que m'avès més coumo acò dins la pasto,
E li siéu coumo un gau.

SUCRADO
Toun afaire se gasto
E se tènes pas lèu tout çò que m'as proumes .

BARLINGO
Cresès que me sariéu coumo acò coumproumes
S'èri pas ‘sta segur de teni ma paraulo?

SUCRADO.
Emé toun èr gavouet me fas la cato-miaulo.
M'as deja dit vint còup: Mei papié, dóu païs
Vènon pas.

BARLINGO
Que faire ?

SUCRADO
E bèn, vao à m'avis !
L'i a toutaro sièi mes, Barlingo, qu'acò duro
Se finisse pas lèu, plus ges de counfituro.
Vai te faire brusca. Siéu lasso d'espera.

BARLINGO:
Pus lèu que noun cresès veirés qu'acò sara.

SUCRADO
Mai quouro ?

BARLINGO
Passaren belèu pas la semano

SUCRADO
Dei tres dijòu ? Merci

BARLINGO
Ma bello soubeirano....

SUCRADO
De vuè jour en vuè jour, vesi passa lei mes,
La fin de l'an vendra: qu' aura mes. aura mes.
La voueli pas couifa, iéu, Santo Catarino !

En souto, fas la court à misè Muscardino....

BARLINGO (*à despart*)
Ai! ai! ai!

SUCRADO
La muouie de mouussu Biscoutin!
Crèses que sabi pas tout aquéu pichot trin ?
Mai a l'uei vièu, lou peis...à misè Bescuechèlo .
Assajes d'agrada ... Quand te n'en fau de bello?
Sian deja tres eici que voudries prendre auvòu!
Pèr un gau coumo tu trovi qn'es foueço tròn.
Mouussu dóu magasin passo dins la cousins
E pèr lou metre eu goust, li fau que tres galino....
Mai sauprai, quand faudra te metre à la resoun
Auriéu qu'à dire un mot a mouussu Calissoun,
A mouussu Biscoutin, e dins un coup d'espalo
Te fariéu debaussa, galapian! de l'espalo.

BARLINGO
Coumo lou parpaïoun, eis alo de velou,
Cerqni de me pauva sobre toutei lei flous.

SUCRADO
Si crès un parpaïoun es encaro qu'un verme ?

BERLINGO
Se restavi planta, dirias que siéu un terme
E voudrias pas d'un ome ansin digas un pau ?
Se boulegavi pas me prendrias pèr un pan.
Acò fouito lou sang

SUCRADO

Vai t'en fouita la crèmo
Se dins vué jour lou mai, Sucrado es pas ta frèmo
Poues faire toun paquet e juga Ran-tan-pla!
Sus l'èr de: Prèn toun sa ! Cassaras de tavan,

(*Sucrado passo au magasin, Barlingò cou la segui, mai Sucrado li sarro la pouerto au nas .) cradoi,*

SCÈNO III

BARLINGO

(*soulet, davalant la scèno*)

Barlingò, moun ami, t'an pres à l'aubaresto.
Sies toumba sus un pèis qu'a de grosseis aresto
Dison que lei gavouet soun fin; mai aquest còup
Ti sies laissa pesca coumo un mùjou... n'ai pòu!
Que pensarien de iéu, dins nouesteis encourntrado,
Se me vesien ansin dintre la marmelado ?
Pauro mousco toumbado au mitan dóu sirop.
Te li sies enviscad e teis alo an d'acroc.
Te n'en tiraras pas sènsø bruti lei pato.
Pèrque vas metre ansin lei det dins la pignato
Sènsø faire atencien qu'en souto li a de fue ?
Coulomla tiraras toun esplingo, dóu jué?
Se te marides pas, la pichoto mastino
Fouèro d'aquest oustau te fa pica d'esquino:
Anaras mai coumpta leis aubre, sus lou Cous...
Se te marides, poues plus faire l'amourous...
Adiéu la Muscardino emé la Bescuechèlo ?
Es dóumàgi pamens de rata doues femèlo
Tant pouolido qu'acò!... Se te sies peçuga,
Moun paure Barlingo, e sies coumo lou gaf
Que se pou plus tira dóu mitan de l'estoupo,
Prego Diéu que lou vent te boufe mai en poupo
Pèr te n'en derraba. Te dirai d'aqui ...
Coulomli arribaras, sucamen?... Vetaqui
Mounte lou bast me quicho e senti que me màco...
(*Biscoutin paréi au daut de l'escalié, à dèstro*).

Biscoutin! lou patroun!... Me vau metre à l'estaco.

(*Intro dins lou labouratori*)

SCÈNO IV

BISCOUTIN

(davalant de l'escalié)

Sus ma tèsto. de niéu courron d'eici, d'eila
E moun front souloumbrous n'es tout enmantela,
Desempièi quauque tèms camini dins la fousco
E toutei, dins l'oustau, semblon pougnu dei mousco.
Ma fremo, d'aigro qu'èro, aro a lou teta dous
E de longo me fa la pato de velous.
Se n'en fau mesfisa d'aquelo que vous flato;
La provo que li fa manjoun, es quand se grato.
Se voulès aganta la maire dins lou nis
Li anas daise e prenes lou camin de galis:
S'escoundès vouèste jue, lia quauco maniganço.
Mai m'agantara pas ; counèssi l'estiganço.
E me li lisi pas en tout aqueleis èr...
Eme lei fremo fau avé leis uèi dubert.
Pèr saùpre d'ounte vèn, ai devira ma tèsto
Coumo quand deviras lei mancho d'uno vèsto;
Ai enca rèn trouha... Pamens, li a de nouvèu..
Quand lou bèu viro au laid, vo lou laid viro au béu,
Li a quaucarèn de mai vo de mèns, que se passo;
Lei cato chanjon pas pèr rèn sei cat de plaço.

(Calisson paréi au d'aut de l'escalié, à senèstro.)

SCÈNO V

BISCOUTIN, CALISSOUN

CALISSOUN (*davalo senso veire Biscoutin*)

(Cridi cebo dóu còup ! e fau lou mut, lou sourd.

Bescuechèlo, èro. antan, sèmpre de boueno imour
E vuèi, coumo lou tèms, es talamen chanjado,
Que me siéu demanda se sarie pa'nribiado,
Se l'aurien pas mourdudo! ... ai segui lei quartoun
De la luno, e toujour es la memo cansoun
Lou chanjamen s'es fa per la luno nouvello
Quand li ai vist prendre ansin uno mino faurello
Ai di: Fau espera que siegue dins soun plèn!
Li es intrado au ,jour d'uei: mai que li a fa? pas rèn
De sorto que fau pas va metre sus sa fauto
Se varaio souvent, quand la fremo es malauto
Alor de mounte vèn, ma mouiè, qu'es ansin?

Li coumpreni plus rèn: mandi ma lengo ei chin.

BISCOUTIN (*à despart*)

Se duro enca long tèms coumo acò, Muscardino,
A forço de passa la man su moun esquino
Finira per...

CALISSOUN (*id.*)

Acò me sarié bèn egau
Se quand la vieu ansin mounta sus sei chivau.....

BISCOUTIN (*id.*)

Fariéu bessai pas mau de va dire, se duro.
A l'ami calissoun...

CALISOUN (*id*)

La cauvo es Piei tròu duro
E la counfisarai à l'ami Biscoutin

BISCOUTIN.,

Es un om de sen.....

CALISSOUN (*id*)

Sàbi qn'à lou nas fin
(*En caminnat la testo souto, se trobon nas à nas.*)

BISCOUTIN

Lou vetaquit!

CALISSOUN

Eds èu !

BISCOUTIN

Toumbas d'aploumb! pensavi
De vous ana trouba.

CALISSOUN

E ièu que vous cercavi!

BISCOUTIN

La questioun es-?..... Veguen !

CALISSOUN

Parlarai après vous.

BISCOUTIN

Nani! Sias moun einat.

CALISSOUN

Anan perdre lon cous
de la counversacieun.

BISCOUTIN
Coumenças ; vous escouti.

CALISSOUN
Se va voulès ansin .

BISCOUTIN
Agués pas pôu que boufi
Un soulet mot avans.

CALISSOUN E BISCOUTIN
Bèn, vous figurarès
Que ma fremo, ..

CALISSOUN
En parlant toutei dous à la fés
Arribaren jamai à poudé nous entendre.

BISCOUTIN E CALISSOUN
Ma fremo.... mamouiè....

BISCOUTIN
Poudèn pas nous coumprendre.
CALISSOUN
Se li anan coumo acò, toucaren pas lou bont.

BISCOUTIN
Veirès que finiren pèr rèn dire de tout.
(*Barlingo, lei bras estroupa, lou faudièu blanc, la casqueto roundo sus la tèsto, parèis sus la pouerto dóu labouratòri*).

SCÈNO VI

CALISSOUN, BISCOUTIN, BARLINGO

BARLINGO (à despart)
Parlas-me dóu travai, fa veni leis idèio...
N'ai vuno dins lou su qu'en fasent lei dragèio
Mes vengudo... Es Un plan... o mai un plan couquin.

CALISSOUN (vesènt Barlingo).
Anen parla pu luen.

BISCOUTIN
Voui ! dins lou magasin

CALISSOUN (sus la pouerto)
Passas davans,

BISCOUTIN

A vous,

CALISSOUN

Esti siau.

(*Vènou pèr passa toutei dous au còup et poudon pas*).

BISCOUTIN (*risènt*)

Es pèr rire ?

(*Fan mai lou meme juè. Bartlngo retèn Biscoutin*)

BARLINGO (*daise*)

Bourgès, auriéu dous mot sucamen, à vous dire.

BISCOUTIN (*se revirant*)

Aro es pas lou moumeu.

BARLINGO

Es dins voueste interès.

Sara lèu fa, veirès.

BISCOUTIN (*à Calissoun qu'es au magasin*)

Se parlaren après.

(*Sarro lapouerto e vènon sus la scèno.*)

SCENO VII

BISCOUTIN, BARLINGO

BARLINGO (*mete lou farrou*)

Laissas me bèn sarra, la pouerto pourrie batre.

BISCOUTIN

Que li a, veguen?

BARLINGO

Pèr vous me coupariéu en quatre,

Mai per voueste assoucia me coupariéu pa'n dous.

Soun cors entie vòu pas un pichot det de vous !

BISCOUTIN

T'aurié fa quaucarèn ?

BARLINGO

Siéu luen de me n'en lagne.

Moun couer que vous estimo a dre de se n'en plagne.

BISCOUTIN
Alor esplico-te.

BARLINGO
Sènso abri, sènso pan,
Es vous que lou proumié m'avès pourgi la man.
Ei pichot deis auceu. Diéu mando la becado !
M'avés leva la fam. douna la retirado
E dins aquest oustau moun paradis dubert
S'ai vis Evo em' Adam, ai vist, perèu, la serp !

BISCOUTIN (à despart lou regardant)
Es que li aurie peta'n cieucle dintre la testo?

BARLINGO
Vouesto mouiè. bourgés es jouvo. bello ounesto.
Mai emé sei bèus uèi. cresès ço que vous diéu.
Atiro subre vus...

BISCOUTIN
Que dies ?

BARLINGO
L'iro dei Dieu!

BISCOUTIN
Toun lengàgi flouri me douno l'enterigo:
Mai qu'es que fau ei Dièu, dóu founs de ma boutigo?

BARLINGO
Que li fases, bourges?.... poussadas un tresor.
Uno fremo que vau cent còup soun pesant d'or:
E quand avès ansin uoo mouiè superbo
F'au pas vous estouna se la serp souto l'erbo
Cerco de la tenta.

BISCOUTIN
Mouute es aquelo serp ?

BARLINGO
Va vous dirai ,mai fau dreissa la man en l'èr
E proumetre sus la tèsto de vouesto maire
De va garda pèr vous.

BISCOUTIN
Acò 's eisa de faire
Se me laisse, après, l'escracha sout mei'pèd.
Quand la tendrai.

BARLINGO
Bourgns, emé tout lou respèt

Que li deci, pourrèς

BISCOUTIN

Aro, pèr parla coump
Me parles, à mié mot, Evo, mouerde à la poumo ?

BARLINGO

Pancaro: mai bessai que pu tard....

BISCOUTIN

Parlo round,
Aro me n'a trou di, acabo.

BARLINGO (à l'auriho)

Calissoun !

BISCOUTIN (atupi)

Qu'es que veni d'ausi?... Cambo e bras, tout me toumbo!
Ma tèsto esclatara belèu coumo uno boumbo.

BARLINGO

Metés pancaro fue à la poudro, bourgés.
Fau pas faire un petard dins l'aigo.

BISCOUTIN (se mountant pau à pau)

N'en a gés
Qu'aurieu tant pau cresu, sus la Terro capable
De faire un còup ansin' !... Vouli bèn que lon diable
Se lou fau pas peta de mei man...

BARLINGO

Cridés pas
Voueste vin, coumo acò

BISCOUTIN (anant d'un caire à l'autre)

M'estaquí sus sei pas
Coumo l'èurre s'estaco à la cambo dóu roure
M'empegarai contro éu, pèr l'empacha de courre...

BARLINGO (en lou sieguènt)

Acò vau faueço miés.

BISCOUTN (anant au magasin)

Lou guitarai en lué.

BARLINGO((à despart)

E iéu, dins aquéu tèms, pourr ai faire moun juè !
(*Se freto lei man en vesènt dispareisse Biscoutin*)

SCENO VII

BARLINGO, pièè MUSCARDINO

BARLINGO (*soulet*)

Moun plaun va tout soulet. Ai pauva moun levame.
Aquest, pèr lou moumem a d'obro a tria sei grame
E li a plus rèn à cregne aro, de soun cousta.
L'autre, coumo farai, veguèu, pèr l'acousta ?
(*Muscardino parei au d'aut de l'escalié de dèstro*)

MUSCARDINO (*en lou vesènt*)

Es mai aqui, rounfloun !

BARLINGO (*la regardant veni*)

La bello Muscardino
Oih ! que moussèu de rei! e la poulido mino !

MUSCARDINO (*davalant l'escalié*)

Pouedi plus faire uu pas sènsò aquel espravant.
A coumo lou dijòu, es toujour au mitan.

BARLINGO (*li venènt au davans*)

Estello de mei nuè!....

MUSCARDINO (*lou repoussant*)

Machouèto dessecado
Es l'amour que lou ten sé coumo uno arencado.
Emé quatre clavèu, rege, contro un pourtau
Farié bèn coumo acò, clavela sus lou d'aut.

BARLINGO

Coumo un troué d'amadou, moun couer sempre s'abraso.
Au lus de vouesteis uei

MUSCARDINO

Quouro chanjé de fraso ?
Sabes dire qu'acò.

BARLINGO

Quand chanjarés pèr iéu
De sentimen

MUSCARDINO

Alor perdes panca lou fiéu!

BARLINGO

S'embuio dins mei det.

MUSCARDINO
Vaqui ço que te pimpo

BARLINGO
Se moussu Biscoutin, un jour fasié l'artimo...
MUSCARDINO
Taiso-te malurous!

BARLINGO
Li a degun d'inmourtau.

MUSCARDINO
Auriés manda quaucun pèr lou tua ?

BARLINGO
De l'oustau
Quauque jour tant pourrié ana courre bourrido.
Moun Dieu! n'arriho tant dins lou cou de la vido...
Li a d'ome qu'en d'essous sabon. faire soun juè
E lei fremo, jamai li veson qie de fué.

Va coumprenon au fum quouro leis estubasso.

MUSCARDINO (*lou regardant entre lei douz uei*)
Aurieu jamai cresu que dedins ta carcasso
Li aguesse tant...

BARLINGO (*la coupant*)
D'amour?... Coumandas à moun couer
Quand siéu pròchi de vous, de pas tant battre fouert.

MUSCARDINO
Li sian mai!

BARLINGO
Resounas, e veirés s'es ma fauto
Dóu moumen que vous viéu, s'ai la tèsto malauto.
Es vous que me fasès perdre ansin la resoun.

MUSCARDINO
L'avugle va dis mai qu'a perdu soun bastoun!

BARLINGO
Perqué me faire ansin passa la vido duro ?
Au debasta de l'ai se vés la macaduro!...
Vous sarié tant aisa, pamens, de me gari...

MUSCARDINO (*au public*)
D'uno vermino ansin quand sarès agarri,
Lou mouien lou plus court pèr poudé v'en desfaire.
Sara d'ana va dire à vouèste ome...

BARLINGO (*idem*)

Pecaire !

Soun toutei coumo acò, lei fremo. En aquest cas
Li veson pas pu luen que lou bout de soun nas.

L'ome dins aquéu téms es emé sa mestresso
Que se lipon lou mourre e se fan de caresso.

MUSCARDINO

Es que diriés acò per moussu Biscoutin ?

BARLINGO

A pas lou grun de sau sus la couet, lou mesquin
Coumo cado toupin trobo sa cabucello...

MUSCARDINO

Aurié trouba la siéu ?

BARLINGO

Tout just!

MUSCARDINO

Es ?

BARLINGO (*emé mistèri*)

Bescuechelo !

MUSCARDINO (*en risènt*)

Pèr aquelo au gas !

BARLINGO (*emé sang-fré*)

Se n'en fa coumo acò,

Que tubon !

MUSCARDINO (*li picant sus l'espalo*)

As un cóup. moun bèu, sus lou coco!

BARLINGO

Sias coumo Sant Toumas, voulès jamai ren crièire.

Se li metias lou det? Se vous va fasiéu veire?

MUSCARDINO

Diriéu qu'as lou nas fin.

BARINGO

Venès aquesto nué,

Entre lei dès e younge.

MUSCARDINO

E mounte?

BARLINGO
En aquest lué!

(*Calisson la tèsto basso e lei man darr é l'esquino, vèn dóu magasin e fa lou tour de la scèno sènsò vèire leli autre. Biscoutin es sobre sei taloune lou seguis pas à pas.*)

SCENO IX

Lei meme BISCOUTIN, CALISSOUN

CALISSOUN (*à despart*)
Biscoutin dèu agué'no nièro dins l'auriho
Que fa qu'arpateja, pòu plus teni sesihos . . .

BISCOUTIN (*id. darrié d'éu*)
Aro, vai, tout soulet pourra plus faire un pas.
Me li siéu estaca coumo un poupre au roucas:
Li va de moun ounour! ... Diéu ! vaqui Muscardino !
Qu'es que fasiés aqui ?....

MUSCARDINO (*risènt*)
Oih ! la dròlo de mino!

(*La prèn per lou bras e l'entraino em'éu au magasin. Barlingo prèn Calissoun à despart*).

SCENO X

CALISSOUN, BARLINGO.

BARLINGO
Bourgés!

CALISSOUN (*bruscamen*)
Qu'es que me vouès ?

BARLINGO (*a despart*)
Coumo es amistadous !
Siéu segur qu'un roumias es encaro pu dous.
A coumo leis oursin, sabès pas d'ount lou prendne.
(*Se plaço au mitan de la scèno e parlo soulet*).
Un sero, aquest iver, jalavo à pèiro fèndre
Lei gat, dins la carrièro. aujavon pas sourti
E coumo dóu païs, pecaire, èri parti,
Dré coumo un panicau, emé la cambo lèsto,
Sabiéu pas mounte anavi ansin pica de tèsto.
Moun paire m'avié di: T'ai mes dintre lei man

Un mestié, fau ana pu luen gagna toun pan;
Sian d'un marrit endré, mounte li a rèn à faire.
Pren tei quiho e vai-t'en! Vous gramaciéu, moun paire,
A Diéu sias L'endeman arribavi dins Ais.
Sàbi pas se lei gènt me cresien sénsò biais,
Trè que pèr cerca d'obro eri sus uno pouerto,
Me vesieu rire au nas. .., Aquelo èro un pau fouerto !...
Acò durè tres jour ansin, sènsò manja.
Coumençavi dejà de me discouraja
De courre coumo acò de longo à l'aventuro
En sarrant la courrejo autour de ma centuro...
Oublidarai jamai qu'es moussu Calissoun
S'ai de pan sout la dènt, e de sóu au boussoun...

CALISSOUN (*venènt pròchi d'éu*)
Es pèr me racunta, veguèn, aquelo istóri
Que m'as fa resta' qui ?

BARLINGO
Nàni ! me rememòri
Acò dins iéu soulet.

CALISSOUN
Alor, que me vouliés ?
Parlo !

BARLINGO
Se m'escoutas, n'en demandi pas miés.
La cauvo vous regardo e vous toco de pròchi !
Mai après faudrié pas m'en faire lou repròchi.
Quand sièu intra'cò vous ai veia nuech e jour
Coumo un bouen chin de gardo, eici, sus vouèste ounour

CALISSOUN
Moun ounour! . . .

BARLINGO
Vouesto fremo es un troues de femello
Coumo n'en a pas trege à la dougeno: es bello!
Oh! que mirau d'amour; que tresor de bèuta!...
Mai toutei lei medaio an soun marri cousta
E sabès que dóu mèu soun groumando, lei mousco...
Tesèu, un rèi dei Grego, un sero, dins la fousco,
En despié dóu dragoun que gardavo un tresor
Finissé pèr rauba sus un autbe, l'Aus d'or.
Pourrié bèn arriba, laissant lou camin libre...

CALISSOUN
D'ounte tires acò?

BARLINGO
L'ai legi dins un libre
D'un ome dóu païs,

CALISSOUN
D'ounte sies?

BARLINGO
De Moustié !
Sus la mitoulougio èro pas dei coustié.

CALISSOUN (*à despert*)
Aro tèni lou fièu, d'après çò que me pinto,
Pèr sourti senso esfort de l'orre laberinto
Mounte m'èri perdu,

BARLINGO
Teseu èro un gros fin ...

CALISSOUN
Aurié fa de pichot?..

BARLINGO
Sarié que Biscoutin! . . .

CALISSOUN
Biscoutin ! qu'es que dies ?

BARLINGO
Uno cauvo seguro!

CALISSOUN
L'aurieu jamai cresu. . lou moustre de naturo!
Sèmblo que dins ma tèsto ai cinquanto martèu...
Un vièi soci...

BARLINGO
Qu'avié lou pan e lou coutèu
A la man... dins l'oustau..

CALISSOUN
Me sènti veni maigre
Rèn que de li pensa.

BARLINGO
Faguès pas de vinaigre
Bourgès, es lou moumen de bèn vous teni dré.

CALISSOUN
A de safran aquéu, emé soun gros sang fré!
Tenès vous, em'acò.

BARLINGO

Gastès pas voueste afaire
Fau que vous revenjès de l'escorno

CALISSOUN

Que faire ?

BARLINGO

Avé l'uei subre d'èu, vous de pròchi, ièu de luen;
Lou tendren à l'arrest. Vous prèsti tout moun suen,
Quand l'auren dessouta...

CALISSOUN

E qu'aurai sus la tèsto. ..

BARLINGO

Esperas un moumen, que vous digui lou rèsto...

CALISSOUN

Me lei derrabarás emé lei dèntt. .. Ah! noun !... .

BARLINGO

Lou mandarés passa sei vièi jour en presoun.

CALISSOUN

Mai tout acu d'aqui, coumprenès pas, bardouio!
Tu, qu'as pas mai de sèn que de couet, lei granouio,
Que me levarié rèn?.. e que voueli passa
Dré, sout toutei lei pouerto, e sènso me baissa?...

BARLINGO

Fau metre la resoun.. .

CALISSOUN

Sies uno esquicho-anchoio
E me fariés veni la meuffo, emé ta voio!
(*Despoutenta, courre au magasin.*)

BARLINGO (*soulet, regardo la pouerto*)

A parti coumo un lam!.. . n'en tèni deja très
E siéu pancaro au bout de ma plego... veirès...

(Ause un gros bru dins lou magasin e se sauvo au labouratòri. Arribo Muscardino à la precipitado).



SCÈNO XI

MUSCARDINO

(*souleto*)

Sàbi pas ço que li a, s'es qu'uno bourrascado.
Mai, coumençan pas mau, aujourd'uei, la journado.
Moun ome, en se levant, dèu ague caussiga
Quauco aragno, jamai m'avié tant bòutuga.
Muscardino?... Que voues?... Isto dins la boutigo!
Ai panca boulega...e sèmblo sus d'ourtigo,
Trapié d'eici, d'eila. ... Calissoun, en courrènt
Arribo; toutei dous alor an d'óucidènt....
Muscardino ! vai-t-en ! . . . emé la gaugno mouerto
Mi crido Biscoutin, e sarro bèn la pouerto
De ta chambro! . . . O, moun bèu, laissarai pas dubert!...
Ah! pèr lou còup, li sian aro, au nis de la serp !
Mai qu'es que me dira lou mot de santo Claro ?
Li a quacarèn que bouihe e la cavo es pas claro...
Se me trouvavo eici boundarié; m'en vau lèu,
Voueli pas despassa la rego de Miquèu !

(*Escalo en courrènt l'escalié de sa chambro à dèstro. A peno intrado, Bescuechèlo parei sus la pouerto de la sièuno, à senèstro e Barlingò espincho dóu labouratòri.*)

SCÈNO XII

BESCUECHELO, BARLINGO

BESCUECHELO (*davalant*)
A l'estro lou soulèu vèn de manda sei rài
E m'a destrassounado au mitan d'un pantai
Que m'avié fa veni lei tressusour... Ravavi...

BARLINGO (*à sei pèd*)
Qu'èri à vouèstei ginous e que vous adouràvi I

BESCUECHELO
Aò sarié toumba de la fèbre au mau caud.

BARLINGO (*dré*)
Desempièi lou moumen que dins aquest oustau
Ai mes lei pèd, sabès, poulido Bescuechelo,
Qu'à meis uei trelusès coumo uno bouèno estello!
M'avès esbarluga.,.

BESCUECHELO
Fau courre au medecin;
Garis lou mau de dènt, eme leis agassin,
E li dirés de vous leva lei cataracho.

BARLINGO
Lou mau es tròu encra, dins moun couer a fa pacho
E li a qu'un medecin pèr aplanta soun cous.

BESCUECHELO
S'isto pas luen d'eici, li fau lèu courre.

BARLINGO
Es vous!

BESCUECHELO
Pecaire! en aquèu cas, vous pregarai de crèire
Que restares enca foueço tems de li vèire.
Anèn ! e levas-vous subran de moun camin.
Aragno dóu matin, prouvèrbi dis: Chacrin!
E vous ai déjà di que tout acò m'lasso.

BARLINGO
Madamo, se va fau, quitarai esto placo,
E luèn, bèn luèn de vous, à forço de soufri,
Lou paure Barlingo s'en anara mourir.

BESCUECHELO
Li manco pas d'espai pèr vous, au cementèri.

BARLINGO
Avès lou couer bèn dur ?

BESCUECHELO
Autant dur que de fèrri.
Mounte pènsas qu'acò, veguèn, pòu vous mena ?
Se Calissoun sabié tout aquéu tracana. ..

BARLINGO
Vouèste ome ?

BESCUECHELO
F'arias pas, long fuè dins la boutigo.

BARLINGO
Oui ! mai a d'autrei chin à fouita! Li a 'n 'intrigo.
Vous sias laissado prendre au musclau.

BESCUECHELO (*à despart*)
Lou pantai
Que fasièu tout escas, sarié-ti dei verai ?

BARLINGO

Vous autrei vesès rèn, sias touteis avuglado
Lei fremo! L'ome fa de vengudo e d'anado
E quand passo de la boutigo au magasin
Sias luen de vous pensa que fa soun pichot trin
Viras toutei d'accord dintre lou meme ciéure...

BESCUECHELO (*dins sei reflessien*)

S'èro la verita, li aurié pas de que viéure.

BARLINGO

Fin qu'au jour que quaucun, dirai de pu sensa
Vous lei fa prendre emé la man dintre lou sa.

BESCUECHELO (*revenènt à-elloc*)

Noun ! noun! es pas veraï.

BARLINGO

Voulés pas me coumprendre.
Ë bèn! qu'es que dirias se vous lou fasiéu prendre
Vouèste bèu Calissoun... Machas entre lei dènt,
Mai emé tout acò me respoundès pas rèn.

BESCUECHELO (*lou prenènt pèr lou bras*)

Veguèn, parlas de bouen, vo bèn parlas pèr rire ?

BARLINGO

Madama, es lou parla que fa parla: fau dire
Touto la verita ?

BESCUECHELO

Vous demandi pas mai.

BARLINGO

Quand lou vin es tira, lou fau bèure, e bèurai !

BESCUECHELO

Vouèli que me digués lou noum de la couquino
Que cerco à desavia moun oustau.

BARLINGO (*emé mistèri*)

Muscardino!

BESCUECHELO(*rasssegurado*)

Muscardino?... que front!

BARLINGO

Ouh ! li a pas de: que front !

E vous lou couparias que vendrié pas pu long.

BESCUECHELO
Caucas fouèro l'iròu, aqui, moun cambarado.

BARLINGO
Voulès aquesto nué, metre sus la bugado?

BESGUECHELO
Noun ! noun ! vous enganas; avès lou det dins l'uei,

BARLINGO
Dóu vouèstre tirarai la paio, trè d'encuei;
E se voulès veni à dèz ouro, este sero
Eici lei troubarés, toutei dous à l'espero.
Courre ges de dangié, voueste ounour, dins l'oustau.

BESCUECHELO (*S'en anant*)
Li vendrai I

BARLINGO (*de meme*)
Li vendrè ?... aro ai gagna lou saut !

(*bescuechèlo pren l'escalé de dèstro e va enco de Muscardino; Barlingdo intro au labouratori. Sucrado arribo dóu magasin*).

SCENO XIII

SUCRADO

(*souleto*)

Aquèu que me dirié, sènsø mai de malici,
Ço que se passo eici, me rendrié bèn servici.
Despièi d'à de matin, es qu'un vai e qu'un vèn
Que n'en finis jamai. Li coumprèni plus rèn:
De-longo ausès crida: Vène eici, Muscardino!
Boulegués pas d;aqui! Noun ! vai à la cousins...
A ta chambro... au saloun... Se moussu Biscoutin
Sauto dóu coumtadou fouèro dóu magasin,
Cra, moussu Calissoun, que petèjo, es en aio,
Lou siègue pas à pas; intrarié dins sei braio,
Cresi, se va poudié. Se moussu Calissoun
Fa douei pas en avans, l'autre es sus sei taloun...
E pièi fau vèire acò quand intro uno pratico;
Touei dous voulon servi. Alor li a' no musico...
Sabès pas qu dei dous es lou mai empreissa;
Mai emé tout acò fau pas èstre pressa,
Coumo voudrien ensèn vite la satisfaire
Em'aquéu demèné finisson pèr rèn faire.
Un negre, tout escas, qu'èro vesti de blanc,
Arribo au magasin e li dis en intrant:

« Madamo m'a manda pèr querre sa faturo.»
Autant lèu Biscoutin se mète en escrituro.
A pas pu lèu fini que dis: La vau pourta !
E Calissoun li fa: Es à vous de resta !
Alor, coumo voudrés. Mai trè qu'es sus la pouerto,
Biscoutin, coumo un fum qu'un coup de vènt empouerto
Fuso pèr l'aganta: Nàni, li dis, li vau !
Lou papié dins lei man resto dré coumo un pau.
Calissoun lou prèn mai, l'autre va li derrabo:
Tiro-tu, tiro-iéu!...coumo un paquet de rabo.
Nàni ! li anarés pas!—Es iéu !—Es à vous?...
E fan tant qu'à la fin, degun li va dei dous.
Lou mouro, emé d'uei blanc, que soutu sei parpello
Luson, coumo la nué lusirien doues candello
Dins lou salamalè finis pèr l'aganta,
Prèn sei cambo à soun couél e courre la pourta.
Se quaucun li coumprèn, siegue di sènsò rire,
Quaucarèn, me fara Plesi de me va dire...
Pèr moun comte, vesès, ço que coumprèni bèn
Dins tout acò d'aqui... es que coumprèni rèn !

(*Barlingo souérte dóu labouratori emé soun viesti de gavouet qu'avié en intrant*)

SCÈNO XIV

SUCRADO, BARLINGO

BARLINGO (*en arribant*)
La journado es fnido. Oih ! coumo lou tèms passo !

SUCRADO (*lou vesènt*)
Té,vaqui lou restant de meis e.scu.

BARLINGO (*countent*)
Bagasso!

SUCRADO
Sies pu reviscoulia qu'un pèis à la sartan.

BARLINGO (*li prenènt la taiho*)
Sucrado, es de pensa qu'aurai lèu vouesto man.

SUCRADO (*lou repoussant*)
Fas gaire de camin...

BARLINGO
Jùri que la besougno....

SUCRADO
Saramen d'amourous es saramen d'ibrougno!

BARLINGO
Li a de pèiro, souvènt, ei draïòu de l'amour.

SUCRADO
Faras lou cantounié e te douni vué jour.

BARLINGO
Es lou comte que fan lei mèstre ei doumestico;
Li dounon sei vué jour...

SUCRADO
Ei marridei pratico!

BARLINGO
E voulès faire ansin ?

SUCRADO
Se sian pas marida
Prendras toun sant-frusquin.

BARLINGO
Deman farai crida.

(*S'en van pèr lou magasin. Bescuechèlo e Muscardino arribon de l'escalier de dèstro*)

SCÈNO XV

BESCUECHÈLO, MUSCARDINO

BESCUECHÈLO (*dins l'escalier*)
Es un garo-bouen tèms .

MUSCARDINO (*en bas*)
Pensi bèn Bescuechèlo,
Que cresès pas un mot d'aquélei bachiquello ?

BESCUECHÈLO .
Avès tròu d'esperit, Muscardino, perèu,
E vous sias pas laissado encougourda pèr eu ?

MUSCARDINO
Es un marri pau-vòu !

BESCUECHÈLO
Digas un brando-biasso !

MUSCARDINO
Es que nous aurié près, eici, pèr sei chòutrasso ?

BESCUECHÈLO
Aquèu trouès de gavouet.!

MUSCARDINO
Aqueu pèu revengu!

BESCUECHÈLO
Lou faren entourna subran, d'ounte es vengu.
MUSCARDINO
Es ço qu'avèn de miés e de pu simple à faire.

BESCUECHÈLO
Ve dian à nouèsteis ome, embandisson lou laire...

MUSCARDINO
Anèn-li d'aquest pas! . . .

(*Au moumen que van passa au magasin, Sucrado, sufoucado arribo en courrènt. Es palo e destimboulado.*)

SCÈNO XVI

MUSCARDINO, SUCRADO, BESCUECHÈLO

SUCRADO (*lei prén pèr la man*)
Madamo !...

BESCUECHÈLO
Que li a mai ?
SUCRADO
Vouèsteis ome. . .

MUSCARDINO
Que fan ?

SUCRADO
Vènon fouele!

BESCUECHÈLO e MUSCARDINO
Acòo, vai !

SUCRADO
Quand vous diéu que touei dous an vira la caloto.

(*calissoun e Biscoutin arribon à grand pas, un darreire l'autre e fan ansin lou tour de la scèno, sènso vèire sei fremo e Sucrado que se soun retziado sus la senèco.*)

SCÈNO XVII

LEI MEMO, BISCOUTIN, CALISSOUN

CALISSOUN (*à despart en caminant*)

Ah! moustre!

BISCOUTIN (*id*)

Ah ! scelerat !

SUCRADO(*à despart*)

An manja de baloto !

CALISSOUN (*toujour meme juè*)

Se si crès coumo acò que lou làchi d'un cran...

BISCOUTIN (*id.*)

Lou perdi pas de visto e vouéli, pan pèr pan

Segui toutei sei pas.

CALISSOUN (*id.*)

Dire que Bescuechèlo

Se laisso enfanfuerla pèr aquelo moustèlo....

BISCOUTIN (*id*)

Ai bel à reflechime sèmble pas verai

Que Muscardino escoute aquel escaravai!

CALISSOUN (*id.*)

Me farien de benouès e restariéu à-n-uno?

BISCOUTIN (*id.*)

Me laissariéu ansin faire de blad de luno?

CALISSOUN (*id.*)

Quand saupriéu de resta sus lou còup....

BISCOUDIN (*id.*)

Cadenoun!

CALISSOUN (*id.*)

Moustre de Biscoutin !

BISCOUTIN (*id .*)

Bregand de Calissoun !

CALISSOUN (*id.*)

Mai ma fremo, mounte es?

BISCOUTIN (*id.*)

Bessai que la chauriho....

CALISSOUN (*id.*)

Vai, l'agantaras pas !....

BISCOUTIN (*id.*)
Ài bouen uei, bouèno auriho...

(*Escalo à grand pas dins sa chambro, a dèstro; Calissoun n'en fa autant, a senèstro.*)

SUCRADO
E bèn ! que n'en pensas? Despièi à de matin
Soun touei douz coumo cò e fan lou meme trin.

MUSCARDINO
Li a d'augó dins la ret !

BESCUECHÈLO
Digas qu'uno taranto
Leis a mourdu, pu lèu!
SUCRADO
Me dounon l'espravanto....
Se venien enrabia !

CALISSOUN (*sobre la pouerto dc la chambro.*)
Bescuechèlo a parti... .

BISCOUTIN (*id.*)
Muscardino li es pas !

CALISSOUN
L'auriéu visto sourti ...
BISCOUTIN (*intro mai*)
Moun sabre !

CALISSOUN (*id*)
Moun fusiéu!
SUCRADO (*esfraïado*)
Faran quauque espetacle !

MUSCARDINO
Sian au sanctus !

BESCUECHÈLO
Pancaro.

SUCRADO
A mèns d'un grand miracle....
MUSCARDINO
Fau vèire de que viro avans de s'esfraia.

BESCUECHÈLO
Partiran pas de soun repaus.

SUCRADO
Soun esglaria

CALISSOUN (*Sus la pouerto un fusiéu à la man*)
Saran parti touei dous....

BISCOUTIN (*id. un sabre a la man*)
M'a rauba Muscardieno !
Se sabiéu mounte soun....

CALISSOUN
Ah ! marrido couquino!

BISCOUTIN (*lou sabre en l'er*)
Me farai un plesi de leis embroucha viéu!

CALISSOUN (*gangassant soun fusiéu*)
Auras jamai fa 'n còup double ansin moun fusiéu!

(*Mounto en courrent dins la chambro de Biscoutin, dóu tèms qu'aquest n'en fa autant 'còd'eu.*)

SUCRADO
Madamo se van tua.

MUSCARDINO
Moun ome a 'no ligousso
Que couparié pa 'n dous, siéu seguro, uno broussو.

BESCUECHÈLO
Calissoun a 'n fusiéu que despièi dous cèns an
Dourmié sus lei traficho, amount, dei caraman.

SUCRADO
S'acò li duro ansin lei faudra metre ei fouele

BISCOUTIN (*sus la pouerto senèco*)
An enfournia !

CALISSOUN (*sus la pouerto dèstro*)
Degun!
(*Davalon deis escaliè en boundant e courron la scèno*).

SUCRADO
Se van roumpre lou couèle.

BISCOUTIN
Qu saup mounte an passa ?. ..

CALISSOUN
Soun dins quauque cantoun.
Foussa de Biscoutin!

BISCOUTIN
Gusas deCalissoun!
(*Cercon dàdestro, un en bas, Ilautre en aut*)

CALISSOUN (*cercant soutu l'escalié*)
Oih! que chaple, moun Diéu! se toumbon sout ma pato.

BISCOUTIN (*id. en bas*)
Leis estrassi touei dous coumo un vièi troues de pato.

CALISSOUN
Lei dessoutarai pas ?

BISCOUTIN (*nas a nas em'eu*)
Ah ! lou tèni!

CALISSOUN (*l'aganto*)
Es aqui!

BISCOUTIN (*lou tenent*)
Qu'es qu'as fa de ma fremo ?

CALISSOUN (*au mitan de la scèno*)
E de la mièu ?

BISCOUTIN
Vaqui
Mounte pignoun lei gat!

CALISSOUN
Biscoutin, pren-ti gardo...

BISCOUTIN
Me fagues pas mounta, Calissoun, la moustardo.

CALISSOUN
E tu me passes pas la païo sout lou nas.

BISCOUTIN
Es qu'ai la chaminèio un pau courto, gusas !
Qu'as fa de Muscardino ?

CALISSOUN
E tu, de Bescuechèlo?
Lou vsés lou grand Turc!

BISCOUTIN
Li falie douès femello !

CALISSOUN
Vouès escoundre toun juè ?

BISCOUTIN
Mounte es ma fremo ?

CALISSOUN
Vai!...

SUCRADO (*daise*)
Fan coumo lou mounié que cercavo soun ai
E que li èro dessus.

MUSCARDINO
Li fau pourta remèdi

BESCUECHÈLO (*li passant au mitan*) (1)
Aves panca fini de juga la coumèdi ?

(1) Biscoutiu, ,Muscardino, Bescuechèlo, Calissoun, Sucrado.

CALISSOUN (*aganto sa fremo*)
Ma fremo!

BISCOUTIN (*id.*)
Ma mouiè!

MUSCARDINO
Mai qu'avès; sias malaut ?

CALISSOUN
E de mounte venès, coume acò?

BESCUECHÈLO
De l'oustau
Avèn pas boulega !

MUSCARDINO
Demandas à Sucrado!

SUCRADO (*leis alucant toutei dous*)
Oih! que còup de soulèu! La bello estoumagado?

BESCUECHÈLO
E vous autre nimai sias pas sourti d'eici,
Vous courrias à l'après coumo dous...

CALISSOUN
Gramaci!

MUSCARDINO
E bèn ! restas planta coumo de sentibelli?

SUCRADO (*passant darriero*)
Vès, moussu, lou pichot vous pende un chichibelli !
(*Se reviron toutei dous e semblon se dereviha.*
Passon au mitan e Sucrado se mete entr'elei (1)

(1) Muscardino, Biscoutin, Sucrado, Calissoun, Besscuechèlo.

BISCOUTIN E CALISSOUN
Mounte es?

SUCRADO
An boulega!

BESCUECHÈLO à *Calissoun*
Fau que nous espliquès
Dounte ven tout acò...

MUSCARDINO à *Biscoutin*
Que nous diguès ço qu'es.

CALISSOUN
Davans lou mounde, ansin?...

BISCOUTIN
Madamo aurias pas crento?

MUSCARDINO
Crento de que ? veguen !

BESCUECHÈLO
Acò noun vous countèto ?

CALISSOUN
Madamo, vau parla.

BISCOUTIN
Sièu sant-Jean bouco d'or !

CALISSOUN
Avès un calignaire !

BISCOUTIN
Un amourous

BESCUECHÈLO E MUSCARDINO (*espntado*)
Alor!..

SUCRADO

Parlon coumo sant Pau, ‘mé la bouco dubèrto!

CALISSOUN

E troubas estounant?....

BISCOUTIN

O fremo disavèrto !

BESCUECHÈLO

Voudriéu bèu saupre qu es....

BISCOUTIN

Lou noum de l’astrogò

Que vous a mes acò dins lou su.

CALISSOUN e BISCOUTIN

Barlingò.

BESCUECHÈLO e MUSCARDINO

Barlingò ?

SUCRADO (*courre au labouratòri e revèn*)

Lou bregand!... Es parti... que doumàgi!

Desempièi qu'es eici me parlo maridàgi !

MUSCARDINO

Tu, perèu !

BESCUECHÈLO

Elo atou ?

MUSCARDINO

Ni n'en falié que tres!

Esperas un moumen e pièi nous jujarés.

BESCUECHELO

Es pas necit qu'eici cerquen de vous desfèndre;

Coumo dins un moumen, à la nué, dèu se rèndre

Eu-meme, en aquest lué, qu'au jour d'uei a causi,

Nous pourrés miés juja trè que l'aurès ausi.

(*La nue es vengudo pau a pau. Barlingò arribo de galapachoun dóu magasin. Muscardino e Biscoutin se retirron sus la senèco; Sucrado, un pau pau aut, dins lou foun e Bescucecèlo e Calissoun, sus la dèstro.*



SCÈNO XVIII

LEI MEME, BARLINGO (1)

(1) biscoutin, Muscardino), sucrado, Barlingò, Bescuechèlo, Calissoun.

BARLINGO (*arribo en chasplant*)
La boutigo es dubèrto e li a que lei cadièro....
Ai prouficha de la pouerto qu'èro badièro
Pèr m'esquiha.... Li a un Diéu, que de nuech e de jour,
Vadfaus ben crèire ansin, vèio sus leis amour!
Ai legi de rouman. au tèms de ma jouvènço
Ounte de cavo ansin n'en èron jamai sèns:
Qu m'auriè di qu'un jour passariéu pèr aqui,
L'autieus jamai cresu.... e pamens me vaqui....
Moun Diéu ! que siéu urous !.... Autre tèms, ma meirino
Me disié: « Siés nascu, Jan, emé la crespino ! »
La pauro avié resoun; soun fihòu Barlingò
D'aquesto ouro es en trin de gagna lou gros lot....
En se plegant coumo un prego diéu de restouble,
A bèn mounta soun plan pèr faire soun còup double...`
Leis ai facho pita tòutei doues au musclau,
E tout àro li sian au quicha de la clau!....
Ai pas pbu dei patroun pèr juga de moun rèsto:
Pèr s'amusa li ai mes de cascavèu en tèsto.

MUSCARDINO (*s'afflatant, d'aise*)
Barlingò, mounte siés?.... arribi au rendès-vous.

BARLINGO
Madamo, laissas-me touumba' vouéstei ginous.

MUSGARDINO
Es pas questien d'acò.

BARLINGO
Poulido Muscardino
A vouéstei pèd voudriéu me trigoussa d'esquino.

MUSCARDINO
N'en parlaren pu tard.

BARLINGO
Aro

MUSCARDINO
M'as di que me fariés dessouta Biscoutiu
Eicito, aquesto nué...

BARLINGO
Es pas proun matin

M'as di que me fariés dessouta Biscoutin

Eicito, aquesto nué...

BARLINGO

Voui!emé Bescuechèlo!

MUSCARDINO

Soun pancaro vengu ?

BARLINGO

Aurias degu, ma bello,

Coumprèndre sus lou còup qu'acò n'èro qu'un jué

Pèr vous faire veni souleto, aquesto nué.

MUSCARDINO

Alor es pas verai ?

BARLINGO

Ruso d'amor , pecaire !

Car iéu vous aimi tant!.

SUCRADO (à despart)

Ah! moustre!

BARLINGO (escoutant àd'estro)

D'aquest caire

Me sèmblo qu'an bruca.... Es l'autro, bèn segur....

Siés près entre douz fué, Barlingo; que bouen ur !

(*Muscardino es retornado próchi de Biscoutin e Bescuechèlo prensa plaço, à dèstro*)

BESCUECHÈLO (S avançant)

Sias eici ?

BARLINGO

Me vaqui!.... Vouésto lus, Bescuechèlo,

Me fa veni vers vous coumo vers moun estello;

Trelusès à meis uei dins la fousco.

BESCUECHÈLO

Pu bas;

Que moun ome d'amount, au mens, vous ause pas.

BARLINGO

Sabès que siéu l'esclau de vouèsto parladisso,

Que fariéu l'aubre-dré pèr vous, sus la téulisse.

Avès qu'à coumanda; farai coumo lou chin

Que camino davans l'avugle.

BESCUECHÈLO .

S'es ansin,

Anas, pèr coumença....

BARLINGO
Parlas, ma bello mino,
Vous escouli.

BESCUECHÈLO
Me faire aganta Muscardino,
Coumo l'avès proumés.

BARLINGO
Voui! emé Calissoun !
Vai bèn di coumo acò.... mai àro....

BESCUECHÈLO
Mounte soun ?

BARLINGO
Avès dounc pas coumprés, o Bescuechèlo! qu'èro
Entre nautre sié di, uno ruso de guerro ?

BESCUECHÈLO
Alor li vendran pas ?

BARLINGO
Li avié rèn de pu faus!

BESCUECHÈLO
M'avès troumpado ansin ?

BARLINGO
Escoutas mei prepaus:
Aviéu fam, aviéu set de vous vèire souleto,
Pèr vous parla d'amour ...

SUCRADO (*dàdespart*)
Aquelo mouert-peleto!
(*Bescuechelo s'entourno próchi de Calissoun. Suerado prèn sa plaço. Como vèn pèr li prendre la taiho, s'escapo de sei man, passo à déetro e li mando un paume.*)

BARLINGO (*cercant de l'aganta*)
Laissas-me prendre au mens....

SUCRADO (*picant*)
Prèn aquèu pastissoun!

(*D'aquéu moumen, Muscardino e Bescuechèlo duerbon la pouerto dóu magasin e fa grand jour sus la scèno. Biscoutin e Calissoun s'avançon. Barlingo resto espanta dàsa plaço e lei bras li toumbon de long dóu cors.*)

BISCOUTIN (S'avançant) (1)

Atout

CALISSOUN (*id.*)

De pico!

BARLINGO (*en lei vesent*)

Aih!... aih !... Biscoutin ! . . . Calissoun ! . . .

SUCRADO (*d'avans d'èu*) (2)

Calobre espetacloous que dintre la bourdio

Un sero ai rabaia...

(1) Biscoutin; Muscardino, dinslou founs, Sucrado Barlingò, Bescuechèlo au mitan, Calissoun .

(2) Bescuechèlo, Calissoun, Barlingo, Sucrado, Biscoutin, Muscardino.

BARLINGO (*lei bras en l'èr*)

Jèsus!... Jóusè!. . Mario!...

SUCRADO

E qu'aviéu recaufa..

BISCOUTIN

Subre toun sèn ?

SUCRADO

Jamai!

Sariè douna de sucre à-n-un nourrigoun! Vai,

Vai-ten, e qu'à meis uèi ti vegui plus parèisse...

Siès enca tròu pichoun pèr ièu... Que Dièu te crèisse,

Pèr te faire creba sus la paio, gusas!

BARLINGO (*suplicant*)

Sucrado, amarieu miés... creba d'à vouéstei bras,

CALISSOUN

Es pas tròu degousta.

BESCUECHÈLO (*à son ome*)

Se la prenié, Sucrado ?

SUCRADO (*à Barlingo* ‘

Noun! vai te faire pèndre oun voudras.

BARLINGO (*à sei ginous*)

Ben amado

Laissas-mi pendre alor, eicito à voueste couéi!

SUCRADO

Noun! m'as tròu fa de mau.

BARLINGO (*se dreissant en plourant*)
La plago me n en couit!

MUSCARDINO (*à Biscoutin*)
Li fau tout perdouna se la prèn pèr sa fremo.

BISCOUTIN
Sarèn proun revenja.

BISCUECHÈLO (*à Calissoun*)
Regardo sei lagremo.

CALISSOUN
Se li pènde à soun couei.

MUSCARDINO
Soun d'acord

BISCOUTIN
Pèrque noun !

BESCUECHÈLO
Aquelou couerdo n'en vau uno autre!

CALISSOUN
As resoun

SUCRADO (*au publi*)

Air : *Je suis lorette*
Lou maridàgi
A touei leis àgi
Es uno esclavitudo, acò se saup:
E tout lou mounde,
Dins èu se founde,
Car li a degun que noun vougue èstre esclau.

BARLINGO
Acò es prouva despièi long-tèms, pecaire!
Que l'us es vièi e qu'a toujour viscu;
Car se ma maire avié pas près moun paire,
A còup segur sariéu jamai nascu.
Lou maridagi, etc.

BISCOUTIN
Maridas-vous, nous dis un filousofo,
E farès bèn! aurès la pèiro au piés.
Un autre dis, en coupant dins l'estofo;
Restas garçoun, farès encaro miés,
Lou maridagi, etc.

MUSCARDINO (à *Barlingo, sus l'avans-sceno*)

Quand aurès près fremo pèr voueste comte

Cercarés mai aquelo dóu vesin ?

BARLINGO

E perque pas ?

MUSCARDINO

Li farias de besconte?

BARLINGO (*emé malici*)

A la façoun de moussu Biscoutin!

Lou maridàgi, etc.

BESCUECHÈLO (*coumo Muscardino*)

Se la liçoun pèr vous es pas perdudo,

Courrirés-mai lei doues lèbre à la fes?

BARLINGO

A doues; riscas de prèndre uno estoussudo...

BESCUECHÈLO

Es bèn verai

BARLINGO (*emé finesso*)

Mai quand n'en courrès trés?...

Lou maridàgi, etc.

(*Biscoutin e Calisson lou prenon un de chasco
nmn e lout menon à dabas de la scèno*)

CALISSOUN

Que te cresíés ? de faire meraviho ? ..

BARLINGO

Perdounarès un moumen de foulie..

BISCOUTIN

Nous aviés mes uno nièro à l'auriho...

BARLINGO (*designant Sucrado*)

Me n'en avès mes uno dins moun lié!

ENSÈN

Lou maridàgi

A touei leis àgi

Es uno esclavitudo acò se saup:

E tout lou mounde

Dins èu se founde:

Car lia degun que noun vougue estre esclau.

Marsiho, lou 24de Desembre 1878

FIN

DE TRES GALINO PÈR UN GAU

Tèste integrau

C.I.E.L. d'Oc

Centre International de l'Écrit en Langue d'Oc

Sèti soucian:

3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc -2000

© Adoubamen dóu tèste, de la meso en pajo e de la maqueto pèr Ugueto Giély,
en sa qualita de mèmbre dóu Counsèu d'Amenistracioun dóu CIEL d'Oc.